

## **Ой, мешачку, мешачочку**

Музика и слова: народни  
Обробка: Ириной Тимко

Ой, мешачку, мешачочку,  
не швиц ти нікому,  
лєм мойому наймилшому,  
кед вон идзе дому.

Швиц ти йому од вечара  
добродію стари,  
а кед придзе мой наймилши,  
теди зайдз за хмари.

Ой, мешачку, мешачочку,  
зайдз за хмари теди,  
док я будзем зоз наймилшим  
нешка на бешеди.

З вечара цма, з вечара цма,  
а над раном ясно,  
нет мойого наймилшого,  
цошка ми го зашло.

Зашла ми го, зашла ми го,  
диджова росичка,  
а хто же ми поцилує,  
мойо били лічка.